

Entschattas – esser denter il vargau ed igl avegnir

Svenja Kaib/GiuRu

Ah gie, novas entschattas. Entschattas porschan adina dus differents aspects. In da quels ei schar encrescher per quei ch'era ina gada ed igl auter ei la malsegirtad, denton era il plascher per tut quei che suonda aunc. Mintga persuna en mintga vegliadetgna scuntra novas entschattas, sco jeu era. Ina da quellas era per mei la decisiun da far suenter il gimnasi in onn intermediar. In onn cun bia temps da ponderar tgei ch'jeu spetgel da miu futur. Sper las ponderaziuns havevel jeu era aunc avunda temps da luvrar.

Quellas duas caussas han purschiu a mi ina fetg buna basa per ils proxims pass en mia veta. Senza quei onn intermediar havess jeu ella retrospectiva buca fatg las dretgas decisiuns per mei e fuss ussa buca nua che jeu sun. Per esser pli exacta fuss jeu ussa buca a Vienna. Sco gia menziunau havevel jeu avunda temps da ponderar e da veser differentas caussas che han influenzau mia decisiun. L'idea dad in di habitar a Vienna havevel jeu gia pli baul, mo che quella idea vegni aschi spert realitad hai jeu mezza buca spitgau. Igl onn vargau hai jeu passentau bia temps a Vienna ed hai adina sentiu pli e pli fetg che quella citad ei per mei sco in niev da casa. Cura che la decisiun ei curdada da definitivamein bandunar mia patria e da far miu studi egl exteriur, sun jeu el medem mument puspei stada all'enschatta dad in niev capetel en mia veta. Tut quei che jeu hai tochen ussa enconuschiu e baghegiu si en Svizra hai jeu bandunau.

Ussa sesel jeu sper il Danubi ed igl emprem aspect semuossa. Numnadamein igl schar encrescher per quei ch'era ina gada. Jeu mirel el horizont e jeu vesel negins cuolms. Sper mei sesan buca mes amitgs ed amitgas sco usitau. Era mia famiglia spetga buca mei a casa cun in «hallo», sche jeu fetschel in pass en dad esch-casa. Denton ei quei buc in sentiment trest mobein in sentiment nunusitau. Quei che jeu hai bandunau en mia patria ei buca semplamein svaniu, tut exista aunc adina entuorn 600 kilometers naven da cheu. Spert hai jeu denton era fatg enconuschientscha cun la malsegirtad ch'igl avegnir porscha. Clar, tut exista aunc 600 kilometers naven da cheu, denton sai jeu buc adina recuorer a quei. Jeu stoi ussa mezza baghegiar si a mi enzatgei en quella tiara aunc jastra. Tgei, sche jeu anflel buca nova glied che vul passentar temps cun mei? Tgei, sch'il studi ei buc aschia sco quei che jeu hai s'imaginau? Tgei, sche jeu hai buca pli bia contact cun las persunas en mia patria e tgei, sche jeu stun mal per la decisiun che jeu hai priu? Biaras damondas cun biaras differentas rispostas. Naturalmein van ins adina ora dil «worst-case scenario», ins sto gie sepreparar per quellas situaziuns. Era jeu hai dramatisau tut ils differents scenaris che savessen schabegiar, mo quei hai jeu spert schau star.

Sch'ins focussescha memia fetg sin las mendras caussas che san schabegiar, ves'ins buca las novas e bialas caussas che schabegian. Glied cun ils medems interess anflan ins adina en in marcau, oravontut en ina metropola da circa dus milliuns habitonts sco Vienna. Il contact cun las persunas ella patria vegn era a star, denton en in'otra moda e maniera. Era sche jeu havess da star mal in di per mia decisiun sesarvan puspei biars differents eschs per proximas

decisiuns che porschan puspei novas entschattas. Proximas decisiuns per quellas ch'ins vegn forse era a star mal. Ins sa buca tgei che schabegia ils proxims onns ni schizun las proximas secundas, mo quei duess buca esser in frein per la realisaziun dils agens siemis. Cun far quitaus piardan ins mo temps. Temps ch'ins drova per veser las bialas caussas, sco jeu il Danubi cun ils radis da sulegl che vegnan reflectai dils sgrataneblas visavi.

Ils «zulprins»

Ils «zulprins», uschia sa numna la rubrica per auturas ed auturs giuvens, ina rubrica che cumpara en collavuraziun da la GiuRu Juventetgna Rumantscha cun la FMR Fundaziun Medias Rumantschas. La finamira cuminaivla da GiuRu ed FMR è da dar spazi e vusch ad auturas ed auturs giuvens. Ils «zulprins» duain damai far qua u là sbrinzlas!

* Dapli infurmaziuns davart la GiuRu sin www.giuru.ch ubain via mail a giuru@giuru.ch.



Realisar ils siemis lunsch naven dils cuolms giu sper il Danubi.

FOTO MAD